



Sesida dals

Communitgà ils

Protocol nr.

23 d'avrigl 2019

26 d'avrigl 2019

295

Incumbensa Wilhelm

concernent in "Green Deal" per il Grischun: nizzegiar la protecziun dal clima sco
schanza

Resposta da la regenza

La strategia da clima ch'è vegnida concludida da la regenza l'onn 2015 è vastamain renconuschida pervia da sia structura concepziunala e pervia da la collavuraziun che funcziuna bain. Ella cumpiglia tut en tut diesch accents d'acziun: dus davart la protecziun dal clima ed otg davart l'adattaziun al clima. Quests diesch puncts vegnan elavurads – fin a dus puncts centrals da svilup – en il program da la regenza 2017–20 entaifer il rom dal plan da finanzas dals departaments e dals uffizis cumpetents. La regenza beneventa l'incumbensa Wilhelm, perquai ch'ella rinforza la via da fin ussa en la strategia da clima. L'incumbensa stuess vegnir realisada entaifer las structuras ed ils andaments ch'èn gia vegnidas creads cun la strategia da clima sco er cumpigliar in'extensiun dal rom dal plan da finanzas ed in'adattaziun da las basas legalas. La regenza è pronta d'acceptar l'incumbensa, ma ils suandants aspects ston vegnir resguardads:

- In plan d'acziun "Green Deal per il Grischun" sto tegnair quint da tuts dus secturs, q.v.d. da la protecziun dal clima ed er da l'adattaziun al clima.
- En il center da la protecziun dal clima stat la reducziun signifitganta e persistente dal consum da carburants fossils cun augmentar l'effizienz energetica e cun duvrar energias regenerablas. En il traffic privat, en l'industria ed en l'agricultura sto agir en emprima lingia la confederaziun. En connex cun ils edificis chantunals e cun il traffic public po il chantun agir sez en il rom da sias cumpetenzas. Qua vali da nizzegiar ils potenzials existents. Las tecnologias ed ils stabiliments persuerter èn avant maun. Las premissas legalas, planisatoricas e finanzialas mancan per part u ston vegnir adattadas. La regenza è pronta da far frunt a quests deficits cun ina revisiun da la lescha d'energia, che realisescha per exempel il model da prescripziuns dals chantuns davart l'energia, e cun promover il traffic public, per exempel per "Retica 30+", sco er cun ina planisaziun directiva d'energia pertutgant l'utilisaziun dals potenzials d'energia existents. Ma per quest intent dovra ella in vast sustegn politic suror ils cunfins da las partidas.
- La protecziun dal clima dovra senza dubi grondas investiziuns da basa, promova percenter nossa capaciad d'innovaziun en tscherts secturs e po augmentar la creaziun da valurs en noss agen pajais suenter ina fasa da transformaziun. Ultra da quai han mesiras d'adattaziun al clima er consequenzas per las plazzas da

lavor, per exempel en la bransch da construcziun pervia d'investiziuns en ovas da protecziun ed en stabiliments per garantir il provediment cun aua e cun aua da stizzar fieu. Er en l'economia da turissem poi dar dapli moviment pervia da las pur-schidas turisticas ordaifer il turissem d'enviern dependent da la naiv.

- Ils meds finansials investids en la protecziun dal clima ed en l'adattaziun al clima duain avoir ina relaziun uschè buna sco pussaivel tranter ils custs e l'effect. Tenor quest princip stoi vegnir giuditgà, sche e nua che meds finansials supplementars vegnan impundids per mesiras a favur da la protecziun dal clima e da l'adattaziun al clima.
- Las mesiras duain vegnir lantschadas da l'administraziun en il rom dals accents d'acziun da la strategia da clima. Sch'i vegnan duvrads meds finansials supplementars per elavurar e per realisar la concepziun, pon quels vegnir mess a disposiziun sin basa dals puncts centrals da svilup.
- Sut il titel "Green Deal per il Grischun" duain pudair vegnir promovidas sistematicain las tecnologias e las mesiras da las interpresas, che han l'intent da reducir ils gas cun effect da serra respectivamain da furnir prestaziuns da l'adattaziun al clima. Per pussibilitar quai dovri eventualmain adattaziuns da leschas chantunalas existentas. La regenza è pronta d'examinar adattaziuns correspudentas e da las preschentar en cas da basegn.
- Dumandada è ina rolla activa da las vischnancas per reducir il consum d'energia en ils edifizis communal e per applitgar dapertut funtaunas regenerablas per il provediment d'energia. La regenza è pronta da metter a disposiziun las basas necessarias per quest intent (model d'ina lescha da construcziun, instruments da planisaziun).

Per realisar in plan d'acziun effizient stoi vegnir fatg quint cun investiziuns unicas da 15 fin 26 milliuns francs e cun custs periodics annuals da 20 fin 50 milliuns francs per la confederaziun, per il chantun e per las vischnancas. Ils custs supplementars che resultan per il chantun n'èn betg cuntegnids en la planisaziun da finanzas.

Sa basond sin questas consideraziuns propona la regenza al cussegl grond da midar l'incumbensa sco suonda:

La regenza preschenta al cussegl grond in plan d'acziun cumplessiv "Green Deal per il Grischun" che cuntegna mesiras concretas ed effizientas per la protecziun dal clima inclusiv in plan da finanziaziun e las adattaziuns necessarias da las basas legalas.



En num da la Regenza

Il president:

Dr. Jon Domenic Parolini

Il chancelier:

Daniel Spadin